

आकाशवाणी जयपुर-अजमेर

प्रादेशिक समाचार

- उच्च न्यायालय रा दखल रे पाछे प्रदेश रा रेजीडेंट डॉक्टर हड़ताल खत्म करी।
- राज्य री सात विधानसभा सीटां रा उपचुनाव मांय नामांकन खातर दो दिन बाकी-हाल ताई 11 नामांकन दाखिल।
- प्रदेश मांय रबी फसलां खातर चावती मात्रा मांय खाद मुहैया-कृषि महकमा री कानी सूं खपत रा आधार माथे जिलां ने खाद बांटी जावेला।
- भारत ब्रैंड चना दाल री बिक्री रो दूजो फेर आज सूं सरू।

000

प्रदेश रा रेजीडेंट डॉक्टर हाईकोर्ट रा दखल रे पाछे आज सिज्या आपरी हड़ताल खत्म करबा रो ऐलान करयो है। इण सूं मेडिकल कॉलेजां मांय परेशान व्हे रिया मरीजां ने राहत मिलेला। जयपुर एसोसिएशन ऑफ रेजीडेंट डॉक्टर्स एक पानडी जारी कर कया के जनहित अर सार्वजनिक सेवा री भावना रे चालता वे यो फैसलो लिया। हालांकि उच्च न्यायालय आज हड़ताल माथे संज्ञान लेता थकां सरकार अर डॉक्टरां रा नुमाइंदा ने न्यायालय मांय बुलाया। न्यायालय चिकित्सा शिक्षा रा सचिव री अगुवाई मांय एक समिति बणा र सरकार ने निर्देश दिया के वे हड़ताल कर रिया डॉक्टरां री मांगां माथे विचार करें। न्यायालय हड़ताल करबाळा डॉक्टरां रे खिलाफ कोई कार्रवाई नी करबा रो निर्देश दिया है।

000

प्रदेश री सात विधानसभा सीटां माथे होबा वाळा उपचुनाव खातर नामपानो भरबा खातर अबे केवल दो बच्योडा है। इण विधानसभा सीटां खातर हाल ताई कुल 11 नामांकन पानडी दाखिल करी गई है। आज दौसा विधानसभा सीट रा उपचुनाव खातर तीन जदके झुंझुनू, खींवरसर अर सलूमबर खातर एक-एक नामांकन पत्र भरयो गयो। भाजपा छह सीटां खातर आपरा उम्मीदवारां रो ऐलाण करयो है, जदके चौरासी निर्वाचन क्षेत्र खातर उण ने हाल उम्मीदवार ऐलाण करणो है। दूजी कानी कांग्रेस रा उम्मीदवारां री सूची किंणी भी टेम आ सके है। बतायो जावे है के कांग्रेस आपरा उम्मीदवारां रा नाम खातर सगळी तैयारी पूरी कर ली है।

इण बीच, मुख्यमंत्री भजनलाल शर्मा काल उपचुनाव वाळा हलकां रो दौरा कर न्यारा न्यारा कार्यक्रम मांय शिरकत करेला। झुंझुनू, अलवर रा रामगढ़, दौसा, अर टोंक रा उनियारा मांय मुख्यमंत्री रो दौरा करबा रो कार्यक्रम है। चुनावी तैयारियां रे तैत आज दौसा जिला निर्वाचन अधिकारी देवेन्द्र यादव अर एसपी रंजिता शर्मा नांगल ब्लॉक मांय बड़ा गांव भोजपुरा, मनपुरिया,

टिटौली प्यारीवास, नांगल राजावतान, रामसिंहपुरा, मलवास, देहलास गांवां रा मतदान केंद्रां रो जायजो करयो।

000

प्रदेश मांय आज केई जिला मांय राख्यी इन्वेस्टर्स मीट मांय 8 हजार 146 करोड़ रुपया रा निवेश खातर एमओयू व्ह्या। चूरु जिला मांय औद्योगिक विकास री दिशा मांय 2 हजार 411 करोड़ रुपया निवेश खातर 92 एमओयू कर्या गया। जिला रा प्रभारी मंत्री अविनाश गहलोत इण मौके कया के इण एमओयू सूं जिला मांय रुजगार रा मौका मांय इजाफो व्हेला। डीग जिला मांय इन्वेस्टर्स मीट मांय स्थानीय उत्पादां री प्रदर्शनी लगाई गई। जिला कलेक्टर उत्सव कौशल बताया के जिला मांय 110 करोड़ रुपया रा 16 एमओयू माथे दस्तखत कर्या गया। पाली जिला मांय राइजिंग राजस्थान रे तैत आज जिला स्तरीय इनवेस्टर्स मीट फालना मांय व्ही। प्रभारी मंत्री झाबर सिंह खर्रा, सांसद पी.पी. चौधरी, कैबिनेट मंत्री जोराराम कुमावत, बाली विधायक पुष्पेंद्र सिंह कार्यक्रम री सरुआत करी। जिला कलेक्टर एल.एन मंत्री बताया के मीट मांय 4 हजार 55 करोड़ रुपया रा 136 एमओयू माथे दस्तखत व्ह्या।

इण ई भांत सिराही मांय जिला स्तरीय राइजिंग राजस्थान इन्वेस्टर्स मीट, प्रभारी मंत्री के.के. विश्णोई री अगुवाई मांय व्ही। इण दौरान राज्य मंत्री ओटाराम देवासी भी मौजूद रिया। आज 1 हजार 570 करोड़ रुपया रा 80 एमओयू कर्या गया। इण सूं अठे 4 हजार 744 लोगां ने रुजगार मिलेला। ब्यावर जिला री इन्वेस्टर्स मीट काल व्हेला। जिला मांय हाल ताई कुल 52 समझौता ज्ञापन माथे दस्तखत कर्या गया है। इण रे तैत 2 हजार 845 करोड़ रुपया रो निवेश व्हेला अर करीब 8 हजार सूं बत्ता लोगां ने रुजगार मिलेला।

000

पैली आळा उपराष्ट्रपति भैरोंसिंह शेखावत री आज 101वीं री जयंती है। इण मौका माथे मुख्यमंत्री भजनलाल शर्मा पुष्पांजलि अर्पित करी। जयपुर रा विद्याधर नगर मांय श्री शेखावत रा स्मृति स्थल माथे श्रद्धांजलि कार्यक्रम राख्यो गयो। पैली रा उपराष्ट्रपति श्री शेखावत री जयंती भरतपुर मांय सिरधाभाव रे सागे मनाई गयी। भारतीय जनता पार्टी रा कार्यकर्तावां रे इतर दूजा संगठनां रा लोग भी वां चित्र माथे फूल चढाया अर देशहित मांय वां रे कानी ऊं करया गया कामां ने याद कर्यो गयो। सवाईमाधोपुर मांय भी न्यारा न्यारा संगठनां री कानी ऊं श्रद्धांजलि सभावां राखी गयी।

000

राज्य रा पैली रा मंत्री बनवारी लाल शर्मा आज वां रा पैतृक रेहवास माथे देवलोक व्हे ग्या। वे 84 बरस रा हा। वे बरस उन्नीस सौ सडसठ मांय पैली बगत धौलपुर सूं विधायक चुण्या हा। वे लगातार पांच बगत वठे ऊं विधायक रिया। कांग्रेस सरकार मांय वणा मंत्री रे अलावा दूजा ओहदा माथे भी काम करयो हो। राज्यपाल हरिभाऊ बागड़े अर मुख्यमंत्री भजनलाल शर्मा वां रे देवलोक

व्हेबा माथे दुःख जताया। प्रदेश रा कांग्रेस नेतावां अर दूजा जान्या मान्या लोग भी श्री शर्मा रे निधन माथे दुःख जताया।

000

प्रदेश मांय रबी फसलां खातर चावती मात्रा मांय खाद मुहैया है। कृषि महकमा री कानी ऊं बत्ती खपत वाळा जिला नं चिन्हित करता थकां सगळा जिलां मांय प्राथमिकता सूं पूरी साफगोई रे साथे डीएपी खाद बांटी जा री है। हाल मांय राज्य मांय 34 हजार मैट्रिक टन डीएपी, 4 लाख 18 हजार मैट्रिक टन यूरिया, 2 लाख 22 हजार मीट्रिक टन एसएसपी अर 52 हजार मैट्रिक टन एनपीके रो भण्डार है। कृषि अर उद्यानिकी महकमा रा शासन सचिव राजन विशाल बताया के राज्य मांय रबी री फसल 2024–25 खातर अक्टूबर म्हीना मांय केन्द्र सरकार कानी ऊं एक लाख 80 हजार मैट्रिक टन डीएपी रो आवंटन करयो गयो, जिण रे खिलाफ 22 अक्टूबर ताई 74 हजार मैट्रिक टन डीएपी खाद री आपूर्ति व्ही।

वे बतायो के राज्य सरकार कानी ऊं बाकी एक लाख छह हजार मीट्रिक टन डीएपी री आपूर्ति खातर केंद्र सूं अरज करी गई है। कंपनीवार आवंटित मात्रा री सौ फीसदी आपूर्ति खातर आपूर्तिकर्ता कम्पनियां सूं लगातार तालमेल थापित कर बेगी ही आपूर्ति री कोशिश करी जा री है। वे बताया के डीएपी रा वैकल्पिक उर्वरक रा रूप मांय सिंगल सुपर फॉस्फेट, यूरिया अर एनपीके रा इस्तेमाल खातर काश्तकारां ने किसान गोष्ठियां अर मेळा रे जरिये सिखावण दी जा री है।

000

भारत ब्रैंड चना दाल री बिक्री रो दूजो फेर आज सूं सरु व्हे ग्यो। भारतीय राष्ट्रीय सहकारी उपभोक्ता परिसंघ लिमिटेड—एन.सी.सी.एफ. अर भारतीय राष्ट्रीय कृषि सहकारी विपणन परिसंघ—नेफेड रे जरिये सूं आ बिक्री करी जा री है। उपभोक्ता कार्य, खाद्य अर सार्वजनिक वितरण मंत्री प्रल्हाद जोशी बताया के भारत चना दाल केन्द्रीय भण्डार, मोबाइल वैन, नेफेड अर ई—कॉमर्स रे जरिये सूं 70 रुपया किलो री दर सूं मुहैया व्हेला। इण रे अलावा चना 58 रुपया किलो, मूंग दाल 107 रुपया किलो अर मसूर दाल नवासी रुपया किलो मिलेला। वे कया के सरकार पेली अलनीनो रा असर री वजह सूं चना दाल सूं आयात शुल्क हटा दियो हो। अलनीनो रा असर री वजह सूं लारला बरस इण रो उत्पादन कम व्ह्यो हो। श्री जोशी कया के बत्ता उत्पादन रे चालता दालां रो कम ऊं कम समर्थन मूल्य बढा दियो गयो है।

नेफेड अर एनसीसीएफ काश्तकारां रे साथे वां रा पूरा उत्पाद री खरीद खातर समझौता माथे विचार कर रह्या है। इण रे अलावा सरकार मूल्य स्थिरता कोष मांय दस हजार करोड रुपया आवंटित कर्या है। इण रकम रो इस्तेमाल मंहगाई ने काबू करबा वास्ते कर्यो जा रह्यो है।

000

पश्चिमी राज्यां खातर सामुदायिक रेडियो सम्मेलन—सीआरएस काल सूं जयपुर मांय सरु व्हे रियो है। दो दिन रो यो सम्मेलन सूचना अर प्रसारण मंत्रालय री कानी ऊं भारतीय जनसंचार संस्थान

आईआईएमसी, नई दिल्ली री मदद सूं राख्यो जा रियो है। सम्मेलन रो विषय “भारत में सामुदायिक रेडियो के बीस वर्ष पूरे होने का उत्सव” है। इण सम्मेलन मांय महाराष्ट्र, मध्य प्रदेश, गुजरात अर राजस्थान राज्यां रा सामुदायिक रेडियो स्टेशन भाग लेवेला। सम्मेलन रा दो दिनां मांय सीआरएस सूं जुड़्या मुद्दा माथे विचार–विमर्श कर्यो जावेला। सम्मेलन मांय सामुदायिक रेडियो नीति मांय बदलाव, डिजिटल युग मांय सीआरएस री प्रासंगिकता, स्वदेशी भाषावां रा संरक्षण अर संवर्धन मांय सीआरएस री भूमिका जेडा विषयां माथे सत्र व्हेला।

000

प्रधानमंत्री नरेन्द्र मोदी आवता दीतवार ने आकाशवाणी रा ‘मन की बात’ कार्यक्रम मांय आपरा विचार साझा करेला। या इण मासिक रेडियो कार्यक्रम री 115वीं कड़ी व्हेला। श्रोता, 25 अक्टूबर ताई टोल फ्री नम्बर 1 8 0 0 – 1 1 – 7 8 0 0 माथे कार्यक्रम खातर आपरा सुझाव भेज सके है। इण रे अलावा 1 9 2 2 माथे मिस्ड कॉल दे र एस एम एस माथे मिल्या लिंक सूं भी सुझाव भेज्या जा सके है। नरेंद्र मोदी एप या माई जीओवी ओपन फोरम रे जरिए ऑनलाइन भी सुझाव दिया जा सके है।

000